



Necrolog per Vinzens Pally

Nies defunct Vinzens ei naschius ils 19 da schaner 1937 sco secund da sis fargliuns a Tschamut.

Siu bab Ludivic ei morts cu Vinzens era aunc in buob da 6 onns. Per motiv da quella greva sort ein ils fargliuns seteni fetg ensemene e gidau la mumma Christina schi bein sco pusseivel.

Vinzens ha frequentau la scola prima-ra e secundara a Tujetsch e silsuenter il seminari da scolasts a Cuera. Gest avon ch'entscheiver la veta profes-siunala ha Diu clamau sia mumma tier el.

Igl onn 1964 marida el Luzia Brugger da Rueras. Ord quella ventireivla lètg neschan treis affons. Ina greva frida tucca la famiglia 1988, cura che la feglia Monica ha giu in accident mortal els cuolms.

La veta da Vinzens ei stada emplenida per la communitad. Sper sia profes-siun sco scolast primar ha el surpriu differents posts sco per exempl dil dirigent dalla musica, dirigent dil chor mischedau da Rueras ed aunc bia outras incumbensas. Ina da sias pli grondas pissiuns era il sunar orgla en baselgia ch'el ha fatg entochen ch'el ha stuiu serender en spital pervia da malcostas. Suenter cuorta e greva malsogna ha Niessegner clamau nies Vinzens, mardis, ils 7 da december tier el.

Vinzens resta a nus en buna memoria sco carstgaun ruasseivel e migei-vel. Car defunct, ruaussa en pasch.

En memoria da Vinzens Pally-Brugger, Rueras, 1937 – 2010



Vinzens cun ses biadis.

Vinzens Pally ei naschius ils 19 da schaner 1937 sco secund da sis fargliuns a Tschamut. Siu bab Ludivic ei gia morts cu Vinzens haveva 6 onns. Ord tal motiv da quella greva sort ein ils fargliuns seteni ensemene e gidau aschi bein sco pusseivel lur mumma Christina nata Deflorin. Vinzens ha frequentau la scola primara e secundara en Tujetsch. Suenter las scolas obligatoricas ha il talentau scolar frequentau il seminari da scolasts a Cuera. Gest avon ch'entscheiver la veta professiunala ha Diu clamau sia mumma tier el. Il Vinzens ha surpriu il pensum da scolast primar a Rueras

ed ei staus fideivels alla Val Tujetsch entochen sia pensiun.

La primavera digl onn 1964 ha Vinzens Pally menau sia spusa Luzia Brugger da Rueras avon gl'altar. Da lur lètg ein duas buobas ed in buob sorti, la luschezia dils premurai geniturs. Ina greva frida tucca la famiglia igl onn 1988, cura che la feglia veglia Monica ha giu in accident mortal els cuolms. Il Vinzens ha giu liung temps dad acceptar tala sperdita.

Ils onns 1969/ 1970 han Vinzens e sia dunna baghegjau ina casa nova a Rueras. Haver in'atgna casa era daditg il giavisch desiderau dil trapassau.

La veta da Vinzens ei stada emplenida per la communitad. Sper sia profes-siun sco scolast primar ed il quitau per sia famiglia ei il Vinzens s'engaschaus per la politica ed oravontut per las uniuns. El ei staus commember dalla cumissiun da gestiun dalla vischnaunca da Tujetsch e biars onns president dalla banca Raiffeisen. Plinavon ei Vinzens s'engaschaus sco dirigent dalla musica da Sedrun, dirigent dil chor mischedau da Rueras, emprem dirigent dalla Gruppa da corns Badus-Sedrun ed aunc en outras uniuns cun incumbensas supplementaras. Ina da sias grondas pissiuns e tschaffen era il sunar orgla en las baselgias a Sedrun e Rueras ch'el ha adempliu tochen sia mort.

Ses hobis preferi eran la catscha e pesca, dar troccas e pli baul jass, ir per bulius e fretgs da caglias. La stad haveva il Vinzens plascher da segidar cul puresser da siu sir Leci Brugger e pli tard dil quinau Leci. Ora sil funs era el egl element e far fein e risdiv fuva per el in gaudi.

Igl onn 1972 ha el fatg igl examen da catscha ed ius a catscha tochen igl onn 2008. Ils emprems onns fuva Mulinatsch en la Val Giuf siu preferiu territori da catscha. Entgins onns pli tard ha el midau Val ed ei daventaus il catschadur da Tschamut, siu liug nativ. Leu eis el ius a catscha da camutschs, denton il bia da cavreuls,

tscharvas ed ils davos onns oravontut da muntanialas. L'Alp Tschamut ei ils davos onns stau siu liug il pli preferiu dad ir a catscha ed il Vinzens ha lu calau dad ir muort il sentir empauet las breigias da trer flad.

Igl onn 1986 ha il Vinzens priu part alla catscha da capricorns e giu il cletg da sittar la caura e silsuenter in bi buc. Quella catscha ha el gudiu cun tut apparti plascher e gaudi.

Il trapassau ei entraus igl onn 1973 ell'Uniun da catschadurs Badus ed ei staus 37 onns commember da tala. El ei staus actuar dall'uniuon ils onns 1974–1978. Igl onn 1997 ei Vinzens daventaus commember veteran ed igl onn 2007 commember liber dall'uniuon Badus e dil BKPJV.

Suenter cuorta e greva malsogna ha el rendiu si'olma al Scaffider ils 7 da de-cember 2010. Pils ses da casa sco era per tutz amitgs ed enconuschents ha siu cumiau muntau dolur e tristezia. La gruppa da corns Badus ha sunau in toc da cumiau per siu emprem dirigent e per nies meriteivel com-member defunct, dil qual nus essan seregurdai dalla radunanza generala e vegnin era a seregurdar a caschun dalla messa da s. Hubert 2011.

Car Vinzens, nus vegnin a salvar Tei en buna memoria. Ruaussa en pasch!

*Per l'Uniun da catschadurs Badus
Norbert Vinzens*